

1. PENDAHULUAN :

Di zaman global masa kini tidak ada negara yang terkecuali dari masalah rasuah. Kesan dan akibat rasuah terhadap ekonomi, politik dan sosial dialami oleh semua negara di dunia. Masalah rasuah telah wujud sejak berkurun lama lagi. Rasuah selalu diibaratkan sebagai penyakit kanser yang boleh merebak kepada masyarakat dan menghancurkan sesebuah negara secara perlahan-lahan. Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam selaku ketua kerajaan adalah sangat-sangat mengambil berat bagi membanteras kegiatan rasuah. Bagi mewujudkan sebuah kerajaan yang jujur, efisien lagi amanah itu, maka atas titah perkenan Baginda satu badan pencegah rasuah telah ditubuhkan yang dinamakan 'Biro Mencegah Rasuah'.

Biro Mencegah Rasuah (BMR) ditubuhkan pada 1 Februari 1982 oleh Kerajaan Kebawah Duli Yang Maha Mulia di bawah Perintah Darurat (Pencegahan Rasuah) 1981. Pada tahun 1984, berikutan kemerdekaan Negara Brunei Darussalam, undang-undang Negara Brunei Darussalam telah disusun semula dan Perintah Darurat (Pencegahan Rasuah) 1981 sekarang dikenali sebagai Akta Pencegahan Rasuah (Penggag 131). Sepanjang 25 tahun penubuhannya, BMR telah menggunakan dan memperkenalkan langkah-langkah dan pendekatan di dalam usaha untuk mencegah rasuah dan juga meningkatkan kesedaran masyarakat tentang bahaya rasuah. Antara program-program yang dikendalikan ialah ceramah, dialog, promo-promo televisyen dan pengedaran risalah. BMR juga sentiasa mencari kaedah baru untuk menyampaikan mesej anti rasuah kepada masyarakat sesuai dengan peredaran zaman yang semakin canggih dan sofistikated agar lebih efisien.

2. RASUAH DI NEGARA BRUNEI DARUSSALAM:

2.1. Jumlah maklumat yang diberi:

Pada tahun 2003 hingga 2006 jumlah maklumat mengenai kegiatan rasuah yang diberikan oleh orang ramai kepada Biro Mencegah Rasuah semakin meningkat daripada 214 maklumat hingga 244 maklumat, tetapi pada tahun 2007 kadar maklumat menurun. (seperti di Lampiran A)

2.2 Tindakan yang diambil terhadap aduan/maklumat yang diterima selepas mesyuarat jawatankuasa menilai aduan:

Jumlah kertas siasatan yang dibuka berdasarkan maklumat yang diterima semakin meningkat dari tahun 2003 hingga 2007. (seperti di Lampiran B)

2.3 Jumlah orang yang didapati bersalah :

Pada tahun 2007, jumlah pegawai dan kakitangan kerajaan dan orang awam yang didapati salah semakin meningkat. Manakala orang yang berkerja di bahagian swasta semakin berkurangan. (seperti di Lampiran C)

3. DEFINISI RASUAH :

Definisi rasuah boleh dikategorikan kepada bahasa, istilah syarak, ahli organisasi/perbadanan dan undang-undang.

3.1 Bahasa :

Dari segi bahasa Melayu, rasuah bermaksud pemberian untuk menumbuk rusuk (menyogok, menyuap), (wang) tumbuk rusuk (sogok, suap). (*Kamus Dewan edisi keempat 2007, Dewan Bahasa dan Pustaka, Kuala Lumpur*)

Di dalam bahasa Arab, rasuah disebut sebagai ar-risywah atau ar-rasywah yang bermaksud sesuatu penyambung yang dapat menghantarkan tujuan dengan harta sogokan. Definisi ini diambil dari asal kata rasuah iaitu ar-rasya yang bererti tali timba yang dipergunakan untuk mengambil air di perigi. (Halim A.S, 1998, m.s. 1)

3.2 Istilah Syarak:

Rasuah menurut Ibrahim An-Nakha'i dalam *Mausu'ah Fiqhiyah*:

“Sesuatu yang diberikan kepada seseorang untuk menghidupkan kebatilan atau untuk menghancurkan kebenaran.”

Rasuah menurut Syeikh Abdul Aziz bin Abdullah bin Baz:

“Memberikan harta kepada seseorang sebagai imbalan pelaksanaan maslahat (tugas, kewajipan) yang mana tugas itu harus dilaksanakan tanpa menunggu imbalan atau wang komisen.” (1498H, m.s 319)

Manakala, Dr. Yusuf Qardawi mendefinisikan rasuah seperti berikut:

“Suatu yang diberikan kepada seseorang yang mempunyai kekuasaan atau jawatan (apa sahaja) untuk memenangkan kesnya dengan menewaskan lawan-lawannya sesuai dengan apa yang ia inginkan, atau untuk memberikan peluang kepadanya atau menyingkirkan saingannya...” (m.s 123)

3.3 Ahli Perbadanan dan Organisasi

Beberapa pengertian rasuah telah diberikan oleh berbagai agensi dan ahli pakar dalam bidang ini. Organisasi seperti Organisasi Pembangunan Kerjasama Ekonomi (*Organisation Economic Cooperation Development*) menyatakan bahawa rasuah adalah “penyalahgunaan kuasa untuk kepentingan peribadi”. (OECD, 1996, m.s 13).

Program Pembangunan Bangsa-bangsa Bersatu (*United Nations Development Program*) mendefinisikan rasuah:

“the misuse of public power, office or authority for private benefit-through bribery, extortion, influence peddling, nepotism, fraud, speed money or embezzlement.” (UNDP, 1999, m.s 7)

Manakala, Mc Kee M.H (1996, m.s 5) mengatakan rasuah :

“involves behavior on the part of officials in the public sector, whether politicians or civil servants, in which they improperly and unlawfully enrich themselves, or those close to them, by the misuse of power entrusted to them.”

3.4 Undang-undang:

Dari sudut undang-undang pengertian 'rasuah' tidak dinyatakan, tetapi yang hanya dinyatakan ialah takrif suapan. Definisi rasuah agak meluas, pengertiannya boleh dilihat daripada pelbagai sudut. Tambahan pula sesuatu hal atau perbuatan sama ada ianya dianggap rasuah atau tidak bergantung pada praktik undang-undang di negara berkenaan.

Rasuah biasanya dikaitkan dengan mata wang atau bentuk monetari tetapi banyak yang tidak menyedari bahawa rasuah juga boleh berbentuk bukan monetari seperti yang dijelaskan dalam undang-undang.

Takrif suapan menurut **Akta Pencegahan Rasuah, Penggal 131, Negara Brunei Darussalam** adalah termasuk:

1. Wang atau apa jua pemberian, pinjaman, upah, ganjaran berharga atau harta benda lain atau kepentingan harta benda dalam apa jua bentuk sama ada uang boleh digerakkan atau tidak;
2. Jawatan, kehormatan, pekerjaan, kontrak atau perkhidmatan atau perjanjian memberi pekerjaan atau khidmat;
3. Pembayaran, pembebasan, penjelasan atau penyelesaian apa jua pinjaman, tanggungjawab atau tanggungan sama ada sebahagian atau keseluruhannya;
4. Pulangan berharga, diskaun, komisen, rebet dan bonus;
5. Menahan diri dari menuntut wang atau sesuatu yang bernilai wang atau barang berharga;
6. Bantuan, sokongan, persetujuan atau pengaruh;
7. Perkhidmatan lain, pertolongan atau faedah;
8. Tawaran, jaminan atau janji untuk memberi atau apa jua suapan seperti yang disebutkan di atas.

4. RASUAH DALAM PERSPEKTIF MELAYU ISLAM BERAJA

Konsep Melayu Islam Beraja (MIB) telah lama wujud di Negara Brunei Darussalam, namun ada yang masih tidak mengenali sejauh mana konsep MIB boleh meningkatkan moral dan perbuatan seseorang. Wujudnya konsep MIB adalah untuk menegakkan prinsip-prinsip dan nilai-nilai Islam yang berlandaskan Al-Quran dan hadis Nabi Muhammad sallallahu alaihi wassalam sebagai kepentingan bangsa, bahasa dan kebudayaan melayu serta keutamaan institusi beraja untuk sistem pemerintahan dan pentadbiran Negara Brunei Darussalam. Dengan adanya pegangan konsep MIB pada seseorang, ianya boleh menjauhkan seseorang itu terlibat dengan kegiatan rasuah.

4.1 Rasuah dalam perspektif Melayu

Dalam masyarakat Melayu ada peribahasa yang boleh dikaitkan bagi orang-orang yang terlibat dengan rasuah seperti 'duit kopi', 'tumbuk rusuk', 'belanja kopi', 'pembasah leher', 'pekaras', 'minyak pelincir', 'wang bawah meja', 'boleh runding', 'faham-faham saja',

'kantau', 'sunglau' dan lain-lain lagi. Berdasarkan peribahasa dan terma tersebut jelas mengatakan bahawa ianya memang ada wujud tetapi disebut dengan bahasa kiasan sahaja.

Bangsa melayu adalah bangsa yang menitik-beratkan soal-soal moral yang tinggi seperti jujur, amanah, ikhlas dan bertanggungjawab. Didikan moral ini sudah diterapkan semasa masih kanak-kanak lagi seperti tidak bercakap bohong, jangan mengambil barang orang tanpa kebenaran, berbuat baik sesama kawan dan sebagainya. Nilai-nilai ini jika sentiasa disemai sehingga dewasa akan melahirkan individu-individu yang mempunyai nilai akhlak yang tinggi kerana mereka sudah terbiasa dengan

mempraktikkan nilai-nilai murni sedari kecil lagi. Nilai-nilai murni seperti ini memang sudah menjadi budaya dalam masyarakat Melayu, apatah lagi dipandu oleh kepercayaan berlandaskan Islam. Oleh yang demikian, nilai-nilai murni yang kita warisi ini hendaklah kita amalkan dan praktikkan sebagai cara hidup kita seharian.

Memberi hadiah atau buah tangan adalah antara budaya masyarakat Melayu yang telah diamalkan sejak berkurun lama terutama sekali dimusim perayaan dan majlis-majlis keramaian. Amalan memberi hadiah atau buah tangan selalu diibaratkan sebagai 'sedekah' atau 'tanda penghargaan' daripada pemberi. Amalan ini memanglah dianggap baik jika pemberian itu mempunyai niat yang ikhlas, jujur dan bertujuan untuk mengeratkan atau mengukuhkan lagi persahabatan yang baik diantara pemberi dan penerima.

Namun, pemberian hadiah itu boleh menjadi rasuah apabila hadiah itu diberi dengan ada tujuan untuk mendapatkan sesuatu istimewa, keuntungan, perkhidmatan daripada pihak yang berkaitan dengan tugas atau urusan rasminya. Terutama sekali, jika perkara ini berlaku berleluasa di antara sektor awam dan sektor kerajaan, maka pemberian hadiah itu boleh berkembang menjadi satu bentuk rasuah. Ini adalah kerana kebiasaan menerima sesuatu dan meminta sesuatu pemberian yang mulanya merupakan hadiah kini menjadi satu kemestian dalam segala urusan.

4.2 Rasuah dalam perspektif Islam

Sebagai negara yang berteraskan Islam sebagai agama rasmi negara, maka adalah bertepatan bagi Negara Brunei Darussalam mendukung hasrat negara untuk sama-sama membanteras rasuah sejajar dengan hukum Islam yang mengharamkan amalan rasuah. Rasuah dikategorikan dalam amalan dosa besar kerana terdapat unsur kezaliman dan mengambil hak orang lain dengan tidak jujur. Ini jelas dinyatakan di dalam Al-Qur'an dan Hadis. Allah subhanahu wa taala berfirman,

"Dan janganlah sebahagian kamu memakan harta sebahagian yang lain di antara kamu dengan jalan yang batil dan (janganlah) kamu membawa (urusan) harta itu kepada hakim, supaya kamu dapat memakan sebahagian daripada harta benda orang lain itu dengan (jalan berbuat) dosa, padahal kamu mengetahui."

(Al-Baqarah, Ayat 188)

Di dalam surah Al-Anfaal ayat 27 kira-kira maksudnya:

“Hai orang-orang yang beriman, janganlah kamu mengkhianati Allah dan Rasul (Muhammad) dan (juga) janganlah kamu mengkhianati amanat-amanat yang dipercayakan kepadamu, sedang kamu mengetahui.”

Di dalam surah Al-Baqarah, ayat 172 pula mengatakan:

“Hai orang-orang yang beriman, makanlah di antara rezeki yang baik-baik yang Kami berikan kepadamu dan bersyukurlah kepada Allah, jika benar-benar hanya kepada-Nya kamu menyembah.”

“Barangsiapa yang telah kami ambil untuk melakukan sesuatu kerja, dan telah ditetapkan baginya sesuatu rezeki (gaji atau upah) maka apa yang diambilnya selepas itu adalah gholul (pengkhianatan)”

(Riwayat Abu Daud)

“Hadiah yang diberikan kepada para Penguasa adalah suht (haram) dan rasuah yang diterima hakim adalah kufur.”

[Riwayat Ahmad]

“Bersabda Rasulullah Shallallahu ‘alaihi wasallam: “Laknat Allah ke atas pemberi rasuah dan penerima rasuah.”

(Hadis riwayat Ibnu Majah)

Disebutkan dalam hadith :-

“Rasulullah sallallahu alaihi wassalam telah melaknat pemberi dan penerima rasuah dalam penetapan keputusan (pemerintahan, pentadbiran, kehakiman dan lain-lain).”(Riwayat At-Tirmidzi, 3/622)

Berdasarkan Al-Quran dan Hadis di atas adalah jelas perbuatan rasuah itu dilarang dari segi Islam. Bukan sahaja pemberi dan penerima rasuah adalah salah dari segi hukum syarak, malahan orang tengah atau orang perantaraan juga dilaknat oleh Allah subhanahu wa taala. Dalam hadis yang diriwayatkan oleh Ahmad, Thabrani, Al Bazar dan Al Hakim, mengatakan:

“Rasulullah sallallahu alaihi wassalam melaknat pemberi rasuah, penerima rasuah dan orang yang menyaksikannya.”

4.3 Rasuah dalam perspektif Beraja

Negara Brunei Darussalam adalah sebuah negara beraja dimana sejak turun temurun telah diperintah oleh sultan-sultan Islam. Kita sebagai rakyat hendaklah wajib taat kepada sultan sebagai pemimpin Negara kita. Di antara cara kita mentaati raja kita ialah dengan mendukung apa jua titah baginda. Mengenai dengan rasuah, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam menegaskan kepada rakyat baginda untuk tidak terjebak dengan kegiatan rasuah. Rasuah boleh menghancurkan negara dan boleh menghancurkan kehidupan manusia walaupun penglibatan seseorang dalam rasuah agak kecil, perkara ini dinyatakan baginda dalam titahnya sempena menyambut tahun baru 2008 masihi:

“... Jangan anggap ‘rasuah kecil’ tidak mengapa, tetapi ingatlah akan risikonya. Kecil atau besar, sedikit atau banyak, adalah sama-sama bernama penyakit, yang boleh menjejaskan negara. Negara yang karam dengan rasuah adalah negara yang malang.”

“Oleh itu, dalam perutusan ini, beta ingin menekankan supaya kita menutup pintu rapat-rapat kepada rasuah. Apabila kita bersih daripada rasuah, Allah pasti memberkati kita dan negara, kerana bukannya Allah telah mengisytiharkan perang terhadap rasuah itu, sehingga barang siapa yang memberi atau menerimanya, orang itu akan dicampak ke neraka?”

Sempena majlis pelancaran kempen anti rasuah dan pembukaan rasmi ibu Pejabat Biro Mencegah Rasuah pada 12 Mei 1992, Baginda bertitah:

“...Rasuah adalah merupakan penyakit masyarakat antarabangsa yang telah lama wujud meracuni kehidupan manusia. Ia berlaku dengan tidak memilih tempat, waktu dan peringkat orang. Pendeknya, di mana-mana dan kepada siapa sahaja ia boleh berlaku atau terjadi.”

“Apabila rasuah adalah sudah berleluasa dan menulari masyarakat, maka masyarakat itu akan kehilangan imej yang baik dan tidak dihormati lagi.”

“Sebagai negara yang ternama lagi berrasuah, maka Brunei Darussalam patutlah mengekalkan ciri-ciri kesedaran menentang rasuah itu hingga ke akar-akar umbinya. Kita tidaklah boleh lalai dari melakukan usaha-usaha pencegahan, walau dengan apa carapun, terutamanya melalui proses undang-undang yang ada...”

Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam menekankan kepada rakyat untuk meningkatkan nilai-nilai murni dan etika yang berkualiti dalam menjalankan tugas harian. Perkara ini telah dinyatakan di dalam titah Baginda di majlis pembukaan rasmi persidangan majlis mesyuarat negeri kali ke 19 pada 21 Disember 1981:

“...Beta sebutkan tadi, maka Beta dengan setegas-tegasnya menekankan bahawa sikap jujur dan amanah itu hendaklah dipupok berlandaskan ajaran-ajaran Ugama Islam, ya’ani, Beta sama sekali menegah pegawai2 di-dalam Kerajaan Beta mengamalkan apa jua bentuk corruption atau rasuah. Insha Allah, Beta akan mengambil tindakan tegas pada mencegah sebarang rupa dan bentuk rasuah di-kalangan pegawai-pegawai dalam Kerajaan Beta...”

Daripada titah-titah Baginda jelas menunjukkan bahawa Baginda amat perihatin dengan gejala perbuatan rasuah yang boleh merosakkan negara, kehormatan dan masyarakat. Baginda juga menitikberatkan agar rakyat bersikap jujur, amanah dan bertanggungjawab bagi mengelakkan perbuatan rasuah tersebut.

Kerajaan memandang berat terhadap gejala rasuah. Sebagai langkah dalam kesungguhan Baginda untuk membanteras gejala rasuah, kerajaan Baginda telah menyatakan kesalahan-kesalahan rasuah di dalam **Akta Pencegahan Rasuah (Penggag 131), Negara Brunei Darussalam**. Di dalam Akta tersebut tersenarai beberapa kesalahan-kesalahan rasuah dan diantaranya yang boleh difahami secara ringkas adalah seperti berikut:

4.3.1 Menerima rasuah

Sesiapa (pegawai kerajaan, swasta, pertubuhan dan orang awam) yang secara tidak jujur memperolehi atau menerima atau bersetuju untuk menerima suapan sama ada untuk dirinya atau orang lain sebagai imbalan atau galakan kerana melakukan atau menahan diri daripada melakukan sesuatu dalam apa jua urusan.

Hukuman denda maksima ialah hukum penjara 7 tahun dan hukum denda tidak melebihi \$30,000 atau kedua-kedua hukuman.

4.3.2 Memberi rasuah

Sesiapa yang secara tidak jujur memberi atau bersetuju memberi atau menawarkan apa jua bentuk suapan kepada sesiapa termasuk pegawai dan kakitangan awam yang berkaitan dengan hal-hal atau urusan orang utama supaya orang berkenaan memberi kemudahan atau sebagai imbalan atau galakan kerana melakukan atau menahan diri daripada melakukan sesuatu dalam apa jua perkara atau urusan.

Hukuman denda maksima ialah hukum penjara 7 tahun dan hukum denda tidak melebihi \$30,000 atau kedua-kedua hukuman.

4.3.3 Menghadapkan tuntutan palsu

Sesiapa sahaja yang menghadapkan kepada seorang yang diambil kerja, sama ada pegawai dan kakitangan kerajaan mahupun swasta segala tuntutan, dokumen dan resit yang mengandungi kenyataan palsu, tidak benar dan salah yang pada pengetahuannya adalah dimaksudkan untuk mengelirukan atau menipu orang yang utama.

Hukuman denda maksima ialah hukum penjara 7 tahun dan hukum denda tidak melebihi \$30,000 atau kedua-kedua hukuman.

Sebarang alasan mengenai memberi atau menerima apa jua suapan dianggap sebagai adat resam, atau amalan yang lazimnya dilakukan dalam sebarang jawatan, perniagaan, pencarian atau pekerjaan, tidak akan diterima dalam mana perbicaraan sivil atau jenayah, seperti yang dinyatakan dalam Seksyen 26 Akta Pencegahan Rasuah (Penggali 131) Biro Mencegah Rasuah. Walauapapun alasan yang diberi, menerima atau memberi rasuah tetap salah.

5. GOLONGAN RASUAH:

Rasuah tidak mempunyai golongan yang spesifik malah ianya dilakukan oleh pelbagai lapisan masyarakat samaada dari golongan berpendidikan atau tidak, golongan atasan, pertengahan atau bawahan.

Di dalam satu kajian yang dijalankan oleh *Transparency International* pada tahun 2007, kajian telah mendedahkan negara – negara yang mempunyai indeks rasuah yang rendah dan negara-negara yang mempunyai indeks rasuah yang tinggi. Dalam kajian tersebut, dapat dilihat terdapat perkaitan rapat di antara rasuah dengan negara miskin. Senarai tersebut adalah seperti berikut:

<i>Senarai Negara-Negara Yang Mempunyai Indeks Rasuah Yang Rendah</i>	<i>Senarai Negara-Negara Yang Mempunyai Indeks Rasuah Yang Tinggi</i>
<i>Denmark</i>	<i>Myanmar</i>
<i>Finland</i>	<i>Somalia</i>
<i>New Zealand</i>	<i>Iraq</i>
<i>Singapore</i>	<i>Haiti</i>
<i>Sweden</i>	<i>Tonga</i>
<i>Iceland</i>	<i>Uzbekistan</i>
<i>Netherland</i>	<i>Afghanistan</i>
<i>Canada</i>	<i>Chad</i>
<i>Norway</i>	<i>Sudan</i>
	<i>Democratic Republic</i>
	<i>Equatorial Guinea</i>
	<i>Guinea</i>
	<i>Laos</i>

Walaupun bagaimanapun, kemiskinan sahaja bukan menjadi faktor utama yang menyebabkan mereka untuk melibatkan diri dengan rasuah kerana golongan orang yang menerima rasuah bukan sahaja yang berpendapatan rendah malahan orang yang berpendapatan tinggi dan mempunyai kuasa. Ini terbukti dengan adanya kes-kes rasuah yang melibatkan ketua-ketua negara, menteri –menteri, ahli korporat, pegawai-pegawai kanan dan sebagainya.

6. SEBAB-SEBAB BERLAKUNYA RASUAH:

Beberapa kajian telah dijalankan bagi mengenalpasti sebab-sebab berlakunya rasuah. Salah satu daripadanya ialah kajian oleh Leslie Palmier, yang mana beliau telah membuat kajian rasuah dalam pentadbiran kerajaan di Hong Kong, India dan Indonesia. Dalam kajian tersebut, beliau telah menyatakan beberapa faktor penting yang menyebabkan berlakunya rasuah iaitu: peluang, gaji dan dasar. Menurut beliau jika pembabitan pegawai dan kakitangan kerajaan dalam pentadbiran dikurangkan, gaji pegawai dan kakitangan dinaikkan dan dasar yang dapat mengurangkan penglibatan pegawai kerajaan yang meluas, ianya boleh mengurangkan perbuatan rasuah. (Palmier, 1985, m.s 2). Mauro membincangkan bahawa jika gaji pegawai dan kakitangan kerajaan terlalu rendah maka mereka akan menggunakan kuasa dan jawatan sebagai peluang untuk mengambil, meminta dan menerima rasuah. (Mauro, 1997, m.s 5)

Walau bagaimanapun, punca sebab rasuah boleh dikatakan terpulang kepada sikap individu itu sendiri. Ini kerana walaupun ada segelintir masyarakat yang berpendapatan tinggi, tetapi masih ada juga melibatkan diri mereka dengan rasuah. Jadi, kemiskinan atau berpendapatan rendah bukanlah faktor utama sebab berlakunya rasuah.

Punca berlakunya rasuah boleh diberikan kepada dua bahagian iaitu: dorongan dalam dan tarikan luaran (Hajah Dewi: 2001, m.s 14). Sifat tamak, keinginan hidup mewah lebih dari kemampuan, kecintaan pada maksiat dan hidup berpoya-poya dan iman yang lemah dan tidak takutkan Allah adalah faktor dalaman berlakunya rasuah. Manakala desakan hidup, adanya peluang yang terbuka menjadi faktor utama bagi dorongan luaran berlakunya rasuah.

Ada beberapa faktor yang menyebabkan berlakunya rasuah yang selalu dibincangkan adalah seperti berikut:

I. Faktor individu

- Kurang penghayatan agama Islam
- Sikap tidak bermoral dan beretika
- Sikap tamak dan kebendaan (materialistik)
- Mempunyai keinginan dan peluang
- Sikap hidup dengan mewah
- Belanja melebihi kemampuan
- Hilang sifat amanah dan kawalan diri

II. Faktor kepimpinan, sistem pentadbiran dan dasar

- Kelemahan pemimpin dalam sebuah organisasi
- Sistem pentadbiran yang tidak efisien dan lemah
- Proses dan prosedur kerja yang memberikan ruang untuk rasuah
- Kelemahan pemantauan dan penyelenggaraan daripada pihak pengurusan dalam sektor awam dan swasta
- Pelaksanaan projek-projek yang tidak mempunyai asas dan kawalan
- Penurunan kuasa yang terlalu banyak

7. KESAN-KESAN RASUAH:

Rasuah membawa kesan-kesan buruk samaada kepada individu, masyarakat ataupun negara. Antara kesan-kesan rasuah yang selalu dibincangkan secara ringkas ialah:

7.1 Kesan–kesan rasuah terhadap individu

- I. Mendapat ancaman dan laknat oleh Allah Subhanahu wa Ta'ala
- II. Tidak mendapat rahmat, taufiq dan hidayat
- III. Jalan mudah ke neraka
- IV. Didakwa di mahkamah
- V. Kehilangan pekerjaan
- VI. Kejatuhan moral atau maruah
- VII. Menerima hukuman penjara dan denda
- VIII. Kehilangan akses dan kemudahan-kemudahan masyarakat

7.2 Kesan-kesan rasuah terhadap keluarga

- I. Menghancurkan keharmonian hidup berumahtangga
- II. Keluarga terabai
- III. Menjatuhkan nama baik keluarga
- IV. Hilang kepercayaan daripada keluarga dan sanak saudara

7.3 Kesan –kesan rasuah terhadap masyarakat

- I. Merosakkan keadilan sosial dan kesaksamaan ekonomi
- II. Kelemahan penguatkuasaan undang- undang
- III. Membebankan golongan orang susah
- IV. Memburukkan lagi taraf kemiskinan kerana sumber-sumber yang telah ditetapkan bagi membantu rakyat miskin diselewengkan
- V. Melahirkan masyarakat yang tiada kemahiran dan skill
- VI. Melahirkan masyarakat yang bersikap tidak bermoral dan etika yang tinggi
- VII. Hilang amanah di dalam sesuatu urusan

7.4 Kesan-kesan rasuah terhadap Negara

- I. Menjejaskan kecekapan dan integriti pentadbiran
- II. Menjejaskan sosial serta kestabilan politik
- III. Tumpuan pembangunan yang tidak seimbang
- IV. Kenaikan kos barang dan perkhidmatan
- V. Mengurangkan pendapatan Negara
- VI. Menurunkan mutu dan kualiti kerja atau produk yang dihasilkan
- VII. Membahayakan kemakmuran dan keselamatan negara
- VIII. Mencemarkan imej negara

8. LANGKAH-LANGKAH MENJAUHI RASUAH:

Beberapa langkah-langkah yang boleh diambil oleh individu untuk menjauhi gejala rasuah secara ringkasnya adalah seperti berikut:

- I. Menjalankan tugas harian berlandaskan ajaran agama Islam
- II. Menanamkan sifat bertanggungjawab dan bertimbang rasa
- III. Menjalankan amanah yang diberikan
- IV. Mematuhi apa yang disuruh
- V. Mematuhi peraturan sosial sejajar dengan landasan budaya dan agama
- VI. Memberikan perkhidmatan yang terbaik dan bermanfaat
- VII. Menanamkan sikap nilai-nilai murni
- VIII. Tanggungjawab dalam menjaga kesucian diri, membina akhlak dan melatih diri mendidik budi pekerti
- IX. Menjauhkan diri daripada akhlak atau kelakuan yang tidak baik
- X. Berusaha untuk melengkapkan ilmu pengetahuan
- XI. Menolak tawaran rasuah dengan tegas

Oleh yang demikian, perubahan ini hanya akan berjaya jika seseorang yang pengamal rasuah itu mengubah dirinya sendiri. Firman Allah subhanahu wa taala:

Tafsirnya: “Sesungguhnya Allah tidak akan mengubah apa yang ada pada sesuatu kaum sehingga mereka mengubah apa yang ada pada diri mereka sendiri...”
(Surah ar-R’ad: 11)

9. MEMBANTERAS RASUAH TANGGUNGJAWAB BERSAMA

Membanteras rasuah melibatkan pelbagai pihak masyarakat. Dengan itu, adalah penting bagi setiap individu memainkan peranan bagi menjauhi kegiatan rasuah. Melaporkan kegiatan rasuah kepada pihak yang berkenaan juga merupakan tanggungjawab semua. Walaupun agensi membanteras rasuah ditubuhkan seperti BMR, akan tetapi strategi agensi tersebut untuk menghapuskan rasuah ke akar umbi tidak dapat dicapai jikalau tidak ada sokongan daripada orang ramai. Masyarakat hendaklah berkerjasama dan berganding bahu untuk sama-sama mendukung hasrat negara dalam membanteras gejala perbuatan rasuah ini dengan cara tidak melakukan rasuah, tidak cuba untuk berjinak-jinak dengan perbuatan rasuah, mengamalkan nilai-nilai murni seperti jujur, amanah, ikhlas dan bertanggungjawab didalam apa jua pekerjaan yang kita lakukan.

10. KESIMPULAN:

Rasuah, walau apa pun jua pengertian yang diberikan oleh berbagai pihak, ianya tetap salah. Sebagai negara yang berlandaskan Melayu Islam Beraja, adalah wajar dan patut kita sama-sama memikul tanggungjawab untuk membanteras rasuah. Kita hendaklah juga mengukuhkan dan meningkatkan nilai-nilai murni serta menghayati ajaran Islam sebagai pegangan hidup. Ini kerana gejala rasuah ini, walau sebesar atau sekecil manapun ianya dilihat tetapi kesan-kesannya adalah amat buruk yang mana akan menjejaskan negara secara keseluruhannya.

“Bersama Membangun Negara Dengan Menjauhi Amalan Rasuah”

RUJUKAN:

- (1) Akta Pencegahan Rasuah Penggal 131, Negara Brunei Darussalam.
- (2) Abu Abdul Halim Ahmad. S (1998), Bahaya Rasuah Kepada Masyarakat Menurut Islam. Pustaka Syuhada, Kuala Lumpur, Malaysia. (m.s 5-29).
- (3) Dr. Yusuf Al-Qardawi, (1408H) Al- Halal wal –Haram, Maktabah Wahbah (m.s 123). Dalam Abu Abdul Halim Ahmad. S (1998), Bahaya Rasuah Kepada Masyarakat Menurut Islam. Pustaka Syuhada, Kuala Lumpur, Malaysia. (m.s 5-6).
- (4) Hajah Dewi Maslehah Haji Md. Yusop (2001) Rasuah Dari Perspektif Agama dan Implikasinya Terhadap Pembangunan Negara. Dalam Beriga Januari- Mac 2001, Bilangan 70, (m.s 14- 20)
- (5) Kamus Dewan (2007), Edisi Keempat, Dewan Bahasa dan Pustaka, Kuala Lumpur. (m.s 1292)
- (6) Mauro, Paulo (1997), Why Worry about Corruption? Washington DC: International Monetary Fund. Dalam Jon ST Quah, 'Comparing Anti-Corruption Measures in Asian countries: Lessons to be learnt', Asian Review of Public Administration, Vol XI, No:2 (Julai-Disember 1999). (m.s 73).
- (7) Mc Kee M.H (1996) *The Transparency International Source Book*. Dalam Utusan Malaysia 16 Februari 1996. (m.s 19-20)
- (8) Palmier, Leslie (1985). The Control of Bureaucratic Corruption Case Studies in Asia. New Delhi: Allied Publishers. Dalam Jon ST Quah, 'Comparing Anti-Corruption Measures in Asian countries: Lessons to be learnt', Asian Review of Public Administration, Vol XI, No:2 (Julai-Disember 1999) (m.s 73).
- (9) Professor Quah, ST. 'Comparing Anti-Corruption Measures in Asian countries: Lessons to be learnt', Asian Review of Public Administration, Vol XI, #2 (Julai-Disember 1999) (m.s 71)
- (10) Syeikh Abdul Aziz bin Abdullah bin Baz (1998, m.s 319) Dalam Abu Abdul Halim Ahmad. S (1998), Bahaya Rasuah Kepada Masyarakat Menurut Islam. Pustaka Syuhada, Kuala Lumpur, Malaysia. (m.s 5-6)

- (11) Tafsiran Ayat-Ayat Suci Al-Quran.
- (12) Titah Kebawah Duli Yang Maha Mulia Sempena Majlis Menyambut Tahun Baru Masihi 2008.
- (13) Titah Sempena Majlis Pelancaran Kempen Anti Rasuah dan Pembukaan Rasmi Ibu Pejabat Biro Mencegah Rasuah, 12 Mei 1992.
- (14) Titah Sempena Majlis Pembukaan Rasmi Persidangan Majlis Mesyuarat Negeri Kali Yang Ke-19, 1981.
- (15) United Nations Development Program (1999). Fighting Corruption to Improve Governance. New York: United Nations Development Programme. Dalam Jon ST Quah, 'Comparing Anti-Corruption Measures in Asian countries: Lessons to be learnt', *Asian Review of Public Administration*, Vol XI,#2 (Julai-Disember 1999) (m.s 71)